

藏書紀事詩

耐庵題籤

鐵琴銅劍樓書目寓簡有胡茨村印 楹書隅錄宋本東

萊博議有燕越胡茨村藏書印 經籍訪古志安南志略

十九卷羽倉用九藏清黃丕烈從五研樓傳鈔本黃氏手

跋曰是書原本爲胡茨村藏余所藏他書亦有胡茨村印

記必好書之人矣頃友人攜徐昂發詩中有題胡茨村畫

像二首急錄之以著其人之時代并識茨村果好書者云

金泥小字刻牙籤連屋書囊當畫轡盡日細繙黃白本始

知閒味十分甜銀魚焚卻幾經春種竹開池寄此身窗外

碧雲高百尺此君清態最宜人前一首可見校書之勤後

一首可想閒居之樂昌熾案茨村名介祉字循齋山陰人

宛平籍少保兆龍子由蔭生歷官河南按察使著隨園詩

集詳見兩浙輶軒錄毛西河詩話載其趵突泉詩一首稱其詩盛爲當時所推竹垞賞屬其刻宋本十家宮詞有序見集中其藏書印冠以燕越二字者以南人隸北籍故耳蕘翁皆未能知也

洞庭波兮渺愁予故人來自碧山居香山海嶽雲林筆價重

人間未見書

孫潛畝園

吹網錄避暑錄話世傳惟稗海津逮兩本曩聞郡中某氏藏有二本一爲孫潛夫依舊抄善本手校於稗海本上一爲抄本而未校者余曾借得未校之本有黃蕘翁跋謂自序一篇商毛二刻所無孫氏据舊抄本補入似卽黃氏錄孫潛夫本也 士禮居藏書題跋記唐僧宏秀集孫潛夫

藏本 鐵琴銅劍樓書目五代史闕文孫潛夫抄卷末記

云辛酉夏六月借黃俞邵鈔本一勘 又江文通集有孫

潛之印孫二酉珍藏諸朱記 昌熾案全謝山校水經注

一爲孫潛夫本謝山跋云予游吳下問諸後進莫知潛夫

之本末者矣潛夫名潛字畝園一字節生又曰知節君又

增錄潛夫跋云康熙丁未十一月十八日從葉石君處借

清常道人三校本一勘又用柳大中家抄宋本再勘是日

石君從洞庭來述中所聞見如李龍眠之馬米元章楷

書寶章待訪錄其所見也白樂天手寫金剛經一行一楷

趙韓王家譜張循王鐵券倪雲林手書所著江南詞其聞

而未見者也

吾愛詩人孫寶洲芒鞋日日訪彬侯家書亦比牛腰大梵志

山經自校讎

孫淇寶洲

海虞詩苑孫淇字寶洲號竹鄉孫氏自西川先生以來以詩世其家君繼之宗仰蓋在白蘇兩家昌熾案淇有市肆蓄書歌爲曹彬侯作云吾生嗜好類蝨蟬此外都非性所喜先業於今說如夢敎授生徒豈得已浮沈薄俗淡世味一卷未能輕脫屣又歲暮書懷云書載牛腰徒壓擔詩餘雞肋未成編是亦能嗜古振奇之士矣 陳祖范孫竹鄉哀詞不踏名場專精文藝祕書可行便腹可笥錢用買文尊開問字或纂或修山書梵志 鐵琴銅劍樓書目元氏長慶集孫竹鄉校過後有題記云戊申六月三十日用董

思翁本校

一匱遮門充閣庋一厨連屋當屏風襟裾牛馬人間世尙有
曹生隱市中

曹炎彬侯

顧千里清河書畫舫題後常熟嗜手抄者陸敕先馮定遠
爲極盛至彬侯殿之彬侯名炎席氏客也 孫淇市肆蓄

書歌爲曹彬侯作云我怪曹生市廛裏偈仄喧囂擁文史

一厨連屋當屏風一匱遮門充閣庋叢殘斷缺勤購買猶

禿干免寫萬紙嗟吁市隱類古人令我長懷賴流泚世人

有書不肯讀問之不答我能揣溫飽嬉閒事游蕩飢寒齷

齷憂妻子昏昏索索年復年牛馬襟裾略無恥又云曹生

曹生負此癖奚翅巨擘挺眾指漫道亡羊均博塞畢竟藏

穀誰非是河東街頭具五民厚資奇貨來千里平生心跡
厭喧雜市道經年罕投趾羨爾家藏萬卷餘下簾終日凭
棐几茗杯香篆伴寂寞大嚼快意何煩爾從今借書數還
往不惜踏穿東郭履 拜經樓藏書題跋記武林舊事抄
本前有鶴溪主人笠澤曹炎之印彬侯四圖記

比似王筠愧未工居龍餘技到雕蟲白頭那得兒曹健且割

烏雞療病風

查慎行悔餘

孫岐昌藥師

全祖望查先生墓表先生名嗣璉字夏重別署查田改名
慎行字悔餘別署初白浙江海甯人康熙壬午 聖

祖東巡召至

行在賦詩入直

南書房明年

特賜進士出身改翰林院庶吉士授編修時公族

子昇以宮坊久侍直宮監無以別之呼先生曰老查海

昌備志查岐昌字藥師一字石友號巖門山樵慎行孫克

念子諸生蒲褐山房詩話藥師著巢經閣讀古記先

生敬業堂集輓呂晚邨詩屠龍餘技到雕蟲賣菽文成事

事工又抄書三首人言冬是歲之餘自分生涯伴蠹魚

比似王筠猶有愧白頭方解手鈔書無數空花亂眼生摩

挲細字欠分明西洋鏡比傳神手八廓重開爲點睛烏雞

已療病風手秋兔猶存見獵心炳燭餘光吾若此兒曹那

不惜分陰天祿琳琅新唐書糾繆宋刻查慎行藏有得

樹樓藏書南書房史官海甯查慎行字夏重又曰悔餘三

印鐵琴銅劍樓書目刑統賦解藏海甯查氏有臣名岐

昌字曰藥師朱記 持靜齋書目龜溪集十二卷有乾隆
庚午巖門山樵查岐昌跋

年少金閨游俠兒不工挾彈善填詞高齋賓客今何在腸斷

摩挲玉印時

納蘭性德容若

揆叙愷功

穴研齋

昭代名人尺牘小傳成德氏納喇又作納臘亦稱納蘭字
容若後改名性德遼陽人太傅明珠子康熙癸丑進士選
侍衛愛才好客所與游皆一時名士嘗集宋元以來諸儒
說經之書刻爲通志堂經解一千八百餘卷精鑒藏尤工
於詞所刻飲水側帽詞傳寫徧於村郊郵壁 國朝詩人
徵略揆叙字愷功滿洲人官至左都御史謚文端有益戒
堂集 伍崇曜飲水詞跋韓慕廬稱容若嘗輯全唐詩選

晚乃篤意於經史茶餘客話稱其天姿英絕蕭然若寒素
擁書數萬卷彈琴歌曲評書畫以自娛 滕陰雜記明太

傅自怡園延唐東江查他山課子揆叙唐有園居雜詠詩
如流水游龍非馬尉赤墀青瑣異王根想見繁華氣象東
江又有哭揆愷功詩云猶有高齋舊賓客可憐水磨好園
林 知聖道齋讀書跋謙牧堂藏抄本金張師顏南遷錄

一卷又云於謙牧堂藏書中得宋元人詞二十二帙題曰
汲古閣未刻詞行款字若與已刻六十家詞同每帙鈐毛

子晉印皆精好 昌熾案謙牧堂愷功藏書處也容若曰

珊瑚閣愷功藏書皆歸 天府 天祿琳琅著錄有謙

收堂印記者皆其家書也武進費昶懷同年藏容若玉印

一面鐫繡佛齋一面鐫鴛鴦館 士禮居題跋記陸游南
唐書丁卯歲收得穴研齋鈔本卷末一頁格旁有虞山錢
遵王藏書七字 又何博士備論通二十六篇不分卷因
其爲穴研齋繕寫珍之先是收得穴研齋諸書初不知時
代先後惟陸游南唐書爲虞山錢遵王藏書則在遵王先
矣他爲宋人說部總得於松江故宦家有賈人知其由來
謂出於康熙朝明相國家 又茅亭客話穴研齋本爲佳
昌熾案茅亭客話後歸亡友蔣香生書鈔閣香生述周
季貺之言曰穴研裝潢精美似 國初旗人之風雅爲事
者或出於明相國家與薨翁所記賈人之言合

誰爲楚濱誰永年草堂新築直沽前豈因小綠天亭印遂誤

觀光自哲鮮

安岐儀周

非石日記書賈錢聽默云傳是樓藏書大半歸於明珠而其家人安麓村所藏亦多善本 又黃蕘圃家觀北宋本

孟東野集上有徐健庵季滄葦及安岐印每本卷末有安麓村橋方圖記 楹書隅錄北宋孟東野詩集十卷每冊

有安岐之印儀周珍藏安麓村藏書印各記安岐字儀周麓村其號也亦號松泉老人天津人顏所居曰沽水草堂學問宏通極精鑒賞收藏之富甲於海內著有墨緣彙觀亦一時博雅好古士也百宋一廬賦著錄此本謂麓村乃賣骨董者誤矣周芸皋觀簪內自訟齋文集謂儀周朝鮮人從貢使入都偶購得抄本書乃前人窖金地下錄其數

與藏處皆隱語徧視京師惟明國公府似之因見明公一
一指視其處先後假金數百萬業鹽於天津揚州息倍之
多富收藏盡以歸國云云語尤荒誕無足辨也昌熾案紅
豆樹館書畫記陳白陽古詩十九首卷有朝鮮安氏圖書
朝鮮安氏書畫圖章安氏子靜鑒定安氏小綠天亭珍藏
諸印是朝鮮實有安氏精鑒藏者芸臯之言得毋以此傳
譌乎

綠樹芳穠小草齊棟花亭下一尊攜金風亭長來游曰宋槧

傳鈔滿竹西

曹寅子清

昭代名人尺牘小傳曹寅字子清號棟亭奉天人官通政
使江甯織造校刊古書甚精有揚州局刊五韻棟亭十二

種盛行於世 宋瑩寄題曹子清戶部棟亭三首序云子清之尊人於白門使院手植棟樹數株綠陰可愛因結亭其閒顏曰棟亭子清追念手澤屬諸名人賦之未幾子清復移節白門十年中父子相繼持節一時士大夫傳爲盛事 王槩題張見陽棟亭夜話圖詩棟亭余每坐清晝牆隅小草穠陰覆棟乃水部手自我亭亦早歲攤書構又云唐渲宋槩任標舉陸海潘江半臣僕 又吳之騷詩我聞棟亭下嘉樹影婆娑書卷擁百城尙友自吟哦 李文藻琉璃廠書肆記棟亭掌織造鹽政十餘年竭力以事鉛槧又交於朱竹垞暴書亭之書棟亭皆鈔有副本以予所見如石刻鋪敘宋朝通鑑長編紀事本末太平寰宇記春秋

經傳闕疑三朝北盟會編後漢書年表崇禎長編諸書皆鈔本魏鶴山毛詩要義樓攷媿文集諸書皆宋槧本錢

大昕菽圃搜奇跋天台徐一夔編此書世無刊本曹子清巡鹽揚州時嘗抄以進

御好事者始得購其副錄

之

愛石何如愛書癖一拳蒼潤琢宣和拈花影鬪維摩詰種樹方抄郭橐駝

龔翔麟天石

杭郡詩輯龔翔麟字天石號蘅圃仁和人康熙辛酉順天副貢歷官御史有田居詩稿十卷田居詩續三卷注云晚年移家張駝園自號田居王石谷爲作田居圖又金志章字繪自號江聲錢唐人有江聲草堂集注云江聲居吳

山之麓高才博學爲龔蘅圃所重延課其子龔氏故多藏
書能盡讀之 鶴徵前錄黃俞邵館江甯龔方伯署中與
令子侍御蘅圃交最契龔藏書甲浙右所刻授經圖春秋
纂例諸書經其校正者爲多 杭大宗東城雜記玉玲瓏
宋宣和花綱石也上有字紀歲月蒼潤嵌空叩之聲如雜
佩本包涵所靈隱山莊舊物後歸龔侍御翔麟因以名其
閣焉侍御爲太常卿佳育子 拜經樓藏書題跋記紺珠
集周耕崖跋云前有橫沙龔氏玉璫瓏閣珍藏圖記又有
龔稼邨祕笈之印校者爲田居爲江聲免牀云稼村田居
皆蘅圃先生自號江聲則金觀察志章別字蘅圃友也
笛漁小橐梁溪華胥爲蘅圃寫僧裝小影侍以雙女一拈

花一奉梵書取心經色空二語曰雙是戲題絕句云一雙
天女玉差肩畀鉢羅花貝葉篇若使香門盡如此丁年儂
亦願逃禪 又題蘅圃擔花圖山居要術如尋得種樹方
應手自抄

脫釧難求本二千莊池玩劇亦論錢長林結得胡盧隱先署
庵名號鹿眠 林佶吉人

東越文苑傳林佶字吉人號鹿原康熙三十八年舉於鄉
五十一年 欽賜進士授內閣中書家多藏書徐乾

學錢通志堂經解朱彝尊選明詩綜皆就傳鈔有樸學齋
集子正青字洙雲莪字涪雲昌熾案樸學齋彙校字題名
男正青在衡在戔玉衡共四人 鮑鈺汪鈍翁說鈴跋雍